

Allannguutissatut siunnersuut

uunga

**Uunga siunnersuut: Nunami inuussutissarsiarutut tunngatillugu inuussutissarsiornermik siuarsaneq pillugu Inatsisartut inatsisaata allanngortinneqarnera pillugu Inatsisartut inatsisaat.**

Inuussutissarsiornermut Aatsitassanullu Ataatsimiitaliami amerlanerussuteqartunit Inuit Ataqatigiit, Siumup Atassutillu ilaasortaatitaanit aappassaaneerinninnermut saqqummiunneqartoq.

§ 1-imut

**1. § 1-imi § 8, imm. 2 imatut oqaasertalerneqassaaq:**

”*Imm. 2. Tapiiffingeqarnissamik neriorsuummik tunniussisoqarsinnaanngilaq, pissarsisussaq imaluunniit pisortaaneqarfimmi siulersuisuniluunniit inuit aqutsisuusut akileraartarnermi inatsimmik annertuumik unioqqutitsisimasutut imaluunniit Kalaallit Nunaanni pinerluttulerinermi inatsimmi aningaasarsiornermi pinerluuteqarnermut aalajangersakkaniq unioqqutitsisimasutut pineqaatissinneqarsimappata imaluunniit pisortanut akiitsoqarpata annertuunik akiligassanngorsimasunik.”*

Siunnersummut nassuaatit

### **Nalinginnaasumik nassuaatit**

Inatsisartut inatsisaanni atuuttumi § 8, imm. 2-mi aalajangersarneqarpoq tapiiffingeqarnissamik neriorsorneqarsinnaassagaanni pissarsisussaq imaluunniit aqutsisuni imaluunniit siulersuisuni inuk aqutsusuusoq akileraartarnermi inatsimmik annertuumik unioqqutitsisimasutut imaluunniit Kalaallit Nunaanni pinerluttulerinermi inatsimmi aningaasarsiornermi pinerluuteqarnermut aalajangersakkaniq unioqqutitsinermut pineqaatissinneqarsimassanngitsoq imaluunniit pisortanut amerlasuunik akiitsoqassanngitsoq.

Inatsisissatut siunnersummi Naalakkersuisunit saqqummiunneqartumi pissarsisussap imaluunniit aqutsisuni imaluunniit siulersuisuni inuup aqutsisuusup pisortanut amerlasuunik akiitsoqannginnissaanik piumasaqaat peerneqarpoq.

Allannguutissatut siunnersuutip kingunerissavaa § 8, imm. 2-mi tapiiffingeqarnissamik neriorsuiteqarsinnaanermut piumasaqaatit atuuttut ingerlateqqinnejassammata, pisortanilli akiitsut eqqarsaatigalugit oqilisaassisqarluni, pisortanut annertuunik akiligassanngorsimasunik akiitsoqarneq kisimi qinnuteqartup tapiiffingeqarsinnaaneranut aporfiulissalluni.

Innuttaasut pisortanut akiitsui annertoqaat ajornarsorsiullu annertusiartortuarluni, akiitsullu ullumikkut 1 milliard kr.-it sinnersimallugit. Innuttaasunut akiitsuminnik ilungersorlutik akiliiniartartunut eqqortuliornerussanngilaq pisortat innuttaasunut suliffeqarfinnullu akiitsut eqqarsaatigalugit pisussaaffimminnik naammassinnissimanngitsunut taarsigassarsisitsisassappata. Allannguutissatut siunnersuut ilaatigut tamanna tunngavigalugu saqqummiunneqarpoq.

Allannguutissatut siunnersuut ass. inuusuttut aallarnisaasut ilinniagaqarnerminnullu atatillugu annertuumik akitsoqalersimasut – ilinniarnermut atatillugu akiitsut akilersornissaannut pisussaaffimmik sumiginaasimanngippata - ass. annikitsunik taarsigassarsinikkut tapiiffingineqarsinnaanerisa mattunneqannginnissaannik kissaateqarnermik tunngaveqarpoq.

### **Allannguutissatut siunnersummi aalajangersakkanut ataasiakkaanut nassuaatit**

*Nr. 1-imut*

Allannguutissatut siunnersuutip kingunerissavaa § 8, imm. 2-mi tapiiffingineqarnissamik neriorsorneqarsinnaanissamut piumasaqaatit atuuttut ingerlatiinnarneqassammata, pisortanilli akiitsut eqqarsaatigalugit oqilisaassisqarluni, pisortanut annertuunik *akiligassanngorsimasunik* akitsoqarneq kisimi qinnuteqartup tapiiffingineqarsinnaaneranut aporfiulissalluni.

Taamaalilluni pisortanut akitsoqartoqarpat annertuunik *akiligassanngorsimanngitsunik*, tamanna aporfiussanngilaq qinnuteqartup ingerlatsinissamut patajaatsumik pilersaarutilip tapiiffingineqarsinnaanissaanut.

Pisortanut akiitsut akiligassanngortutut isigineqartarput piffissamit pisortanut akiitsut akilerneqareersimaffissaannit aallartittumik. Akilersuinissamik isumaqatigiissuteqartoqarsimatillugu akiitsut akiligassanngorsimasutut isigineqartarput akilersuinissamik isumaqatigiissut malinneqarsimannngippat.